

權德輿

竹居攷虞

全唐文

新編


竹居叢書

全唐文

欽定全唐文卷五百一目錄

權德輿

一九



唐故通議大夫守戶部尚書兼御史大夫持節充
朔方鎮西北庭興平陳鄭等州行營兵馬及河
中節度都統處置使兼管內觀察使權知絳州
刺史賜紫金魚袋贈揚州大都督府李公神道
碑銘

并序

唐故朝議郎使持節溫州諸軍事溫州刺史充靜
海軍使賜緋魚袋河

水裴府君神道碑銘

并序

唐故義武軍節度支度營田易定等觀察處置

等使檢校司空同中書門下平章事兼太傅上

谷郡王張公夫人鄧國夫人谷氏神道碑銘并

序

唐故章敬寺百巖大師碑銘并序

唐故寶應寺上座內道場臨壇大律師多寶塔銘

并序

唐故東京安國寺契微和尚塔銘并序

唐故洪州開元寺石門道一禪師塔銘并序

唐故太清宮三洞法師吳先生碑銘

并序

欽定全唐文卷五百一

權德輿

十九

唐故通議大夫守戶部尚書兼御史大夫持節充
朔方鎮西北庭興平陳鄭等州行營兵馬及河
中節度都統處置使兼管內觀察使權知絳州
刺史賜紫金魚袋贈揚州大都督府李公神道

碑銘

并序

周道親親夾輔王室分唐叔以懷姓九宗職官五正故其
後文侯受秬鬯之命文公受大輅之錫祿勳推恩惇敘昌

大理道之所繇也國家憲章文武選建明德元功侯籍延

耀本枝初祖景皇帝之支曰鄭王亮實生淮安王神通用

親賢功德左右休運淄川郡王孝同淮安之昭也左衛

一作

右衛將軍燧淄川之穆也劔州長史贈太僕少卿廣業承祖

禰積厚之慶而生尚書尹三王都總六師帥八命四履投

艱難服勤勞有猷有守以至歿代禮賁於追命澤流於代

官有由然也尚書諱國貞字南華天資風采爲宗室儀矩

冽如寒泉嶷若崇山修身策仕動有休裕開元十三年明

皇帝肆覲東后柴於岱宗以公族侍祠調補綿州參軍事

暴雨忽至江流泛溢公自下位能禦其災旣堅舊防仍復
故道累遷岐州錄事參軍太師苗公太尉房公繼爲二千
石皆所引重御史大夫張倚採訪關中表爲支使天寶末
林胡覆三川犯秦關詔除殿中侍御史爲襄陽郡司馬且
分戎政公以侍板輿辭革車換房陵太守表課尤異徵拜
長安縣令風政肅清改秦州刺史成命中止復爲長安令
尋遷汴州刺史未及行復輟爲京兆少尹天子以公積有
誠效可居大官累命爲河南京兆成都尹劔南西川節度
使其撫周郊獫狁方熾公與太尉臨淮王議曰河洛爲天

下衝且無車賦比屋安堵寇將甘心焉不若虛其邑居挈
以西去羸糧善地可俟師期繇是太尉壁河陽公次於陝
伐謀銷患君子推其智其在京轂兵火之餘大命將泛物
力亦屈而百役煩苦出於傷痍公曰元元愁歎受命惠養
儻不能曠然丕變豈副明天子鬱悼之心耶列上蠲除悉
蒙可報凡調於人者去其十九清靜愷悌百姓稱之其鎮
岷峨裔人樂禍殺嘉榮二州刺史以開邊隙公命將疾攻
舉無遺類明年昆戎圍我三城分遣銳師據便城壁戒嚴
持重徼其極而擊之賈餘無前酣戰盡殪悉獻虜獲軍無

私焉鄰壤不靖偏師叛換將盜兵符已據城寺出車壓境
指顧而平凡三整武經而巴蜀軌道拊循安置四封畏其
威柄用者沮公勲猷徵爲殿中監命書旣下不俟駕行囊
被單車無道里費取倍稱之息五萬甫達京師上嘉而賜
之俾折其券寇有段子章者恣睢就戮方帥以告語聞詔
公宴見前席嘉獎且曰利兵積穀皆卿之素也其無駭忤
父之謂乎朝野嘉其首功而服其潔已臨淮王移鎮海岱
長轂在郊西邊北朔合淮陽圻父五諸侯之旅主盟中權
盡護諸將於是拜戶部尚書河中節度都統使又以職顯

戎重則風俗不阜加管內觀察使權知絳州刺史公外總
方畧內修班制當強弩之末無半菽之糧不忍加賦飛章
未下猶以憲度爲己任椎剽者斃之行師諸校譁張缺望
至是夜暮變起或以跳驅諭公公曰吾之不敏當死節官
下安敢貳偷以煩刑吏亂之剡也公竟及焉議者尚其絜
矩而哀其不淑時上元三年建卯月春秋四十八是歲改
元寶應至夏五月寧神於三原縣之北原詔以揚州大都
督府印綬告第憫其勞也公本諱若幽上元中天子以特
立之操爲宗工表率錫嘉名以更焉公忠儉誠厚方嚴密

靜用儒行憲令修明事功大玉不斲楚金必割凡厯官二十四自解巾至握節勤職十七其以內庭持書中執法亞丞相佩兩印以雄外服者又七命焉刺房陵之後五六年閒車不輟鞅賦職任功名聲章明及公以司徒總輿師令弟若水以內府司贊謁而太夫人福履所介日陳壽觴懷黃佩玉左右溫清極魯侯之燕喜邁張仲之孝友宜錫壽寵爲人倫龜龍曾未中身遭罹凶害前史稱霍去病亦有天幸然則命之所賦有幸焉有不幸焉斯不可問已夫人扶風郡君竇氏鴻臚丞光之女揚府長史御史大夫覲之

妹也淑明柔順克叶公志家肥族睦抑有助焉公薨若干年而夫人歿有子四人長曰錡材器碩茂潔廉忠肅遵修訓則復大其門入作卿士出爲侯伯貞元十五年以御史中丞剖符潤州宣風以宏禮俗成賦以殖財用大績茂焉中邦賴焉明年就加御史大夫十八年進禮部尚書撫封題劒如公渥命次日鑑蘄州刺史次日豐士鄆縣令幼曰豐器長安縣尉皆有幹裕而屈於年位今尚書永惟先公丕矩未刻金石以德輿嘗叨史職久掌贊書知王族大僚之事業見託論譔故不敢沒其美亦不敢溢其言銘曰

堯睦九族漢封同姓烈烈淮安乘時佐命淄川而下二葉
儲慶乃生我公紹續先正時惟宗英忠智廉清所至風行
所居理平山元朱組旣靖蜀京鉞鉞琕戈乃主夏盟交修
藩衛纂服宏大陟降左右勤勞翼戴隱微之間乃與禍會
夷途始半白晝中晦桓楹羽葆久閔鮮原煌煌密章肅肅
絲言盛德復祉藂茲後昆列郡是式价人維藩大江南服
考禮修職五曹十聯克嗣先德董是經費陳之藝極本於
敦忠懋此宣力伊昔祭器實銘烝彝禮則有變魂遊在茲
連岡陂陀宰樹參差悠悠終古永錫斯碑

唐故朝議郎使持節溫州諸軍事溫州刺史充靜

海軍使賜緋魚袋河東裴府君神道碑銘

并序

春秋時賢卿大夫皆敘其代功舊德章明似續蓋黃流玉
瓚之寶產於深山清廟夏屋之材秀於中林其或爲珩爲
珮爲節爲稅無非禮神用備崇構洪河之東裴氏在焉自
魏晉迄今忠賢輩出士林以爲領袖史臣被於簡策而又
弈代降休且公且侯上嬪王姬出領方州者可得而言以
刻金石曰君諱希先字某四代祖懷節皇給事中工部侍
郎荆揚一州大都督府長史洛州刺史謚曰定曾祖昭歷

司門度支二郎中衛尉太府二寺卿祖確厯左右衛左右
金吾衛四大將軍太府卿太子詹事平陽郡開國公諡曰
貞自定公至貞公皆銀青光祿大夫以至烈考忤仕至郾
州刺史太子僕贈絳州刺史凡四代貴仕左曹二千石四
衛九列副冬官尹東朝禮及易名恩深追遠代修其業鍾
美於君君寬裕博厚恭儉莊誠資性端直詞氣閑雅於經
書泛爲疏達而不窮章句於吏道通於理術而不求聞問
自解巾至於捐館凡厯十一官無疵政無違德祇守家法
奉以周旋仕於宮朝始爲僕寺進洗馬中允再爲家令仕